

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

1. मुख्खमंत्री उमर अब्दुल्ला होरें सैलसफा सरबन्धी धड़े कन्नै बैठक लाई ते आखेआ जे कश्मीर च सैलसफा सैक्टर गी बढ़ावा देने लेई गेंस पुट्टियां जा'रदियां न।
2. उपमुख्खमंत्री होरें आखेआ जे सरकार लोकें खास करी बन्ने आहले इलाकें च रौहने आहले लोकें कन्नै ऐ। उन्नै नौशहरा दे बन्ने आहले ग्राएं दा दौरा लाया ते प्रभावित परौआरें गी मदद दा भरोसा दोआया।
3. मंत्री जावेद राणा होरें कब्जा रेखा कन्नै लगदे ग्राएं दे लोकें कन्नै मलाटी कीती ते उंदी दलेरी दी सराहना कीती।
4. भारतीय सशस्त्र बलें दे समर्थन ते उन्दे प्रति आभार व्यक्त करने लेई जम्मू च तिरंगा जातरा कड्डी गई।
5. जम्मू खिते दे बाकी रौहंदे स्कूल 19 मई थवां खुल्ला'रदे न।  
हून खबरें दी तफसील कन्नै श्रुति खजूरिया।

<><><><><><>

### CM-Meeting

मुख्खमंत्री उमर अब्दुल्ला होरें कल श्रीनगर च सैलसफा सरबन्धी मुतलका धड़ें कन्नै इक बैठक लाई ते उंदी चिंताएं गी सुनेआ। इस बैठक दा मकसद मौजूदा हालात दे चलदे खिते च सैलसफा गी परतियै बधाने लेई उपाएं बारै चर्चा करना हा। बैठक च कश्मीर दे डिविजनल कमिशनर, आई.जी.पी, सैलसफा विभाग दे कमिशनर सैकरेटरी हुंदे अलावा होरनें मुतलका धड़ें हिस्सा लैता। इस मौके पर बोलदे होई मुख्खमंत्री होरें खिते च सैलसफा गी परतियै बहाल करने दी इक व्यापक ते सोची समझी दी योजना तैयार करने लेई आखेआ। उन्नै सुझाव दिता जे इस ब'रे दी श्री अमरनाथ जी दी जातरा दे खत्म होने मगरा सैलसफा मैहकमे कन्नै रलियै सैलसफा गी बढ़ावा देने पर केंद्रित इक्क मजबूत रणनीति तैयार कीती जा जेदे च होटलें, शिकारें, दस्तकारी जनेही चीजें दा इस्तेमाल बी शामिल होऐ।

<><><><><><>

### Cy. CM

उपमुख्खमंत्री सुरिंद्र चौधरी होरें उप्परोतली दुए रोज नौशहरा इलाके दे कोई 15 ग्राएं दा दौरा लाया ते हाल च बन्ने पारा कीती गेदी गोलाबारी करी होए दे नुकसान दा जायजा लैता। उन्नै बन्ने कन्नै लगदे इलाकें च रौहने आहले लोकें गी पूरा-पूरा समर्थन देने दी सरकार दी बचनबद्धता गी फी पक्का कीता। द'ऊं दिनें दे इस दौरै दा मकसद गोलाबारी कारण होए दे नुकसान दे कन्नो-कन्नी

जमीनी सतह पर हालात दा जायजा लैना हा। प्रभावित परौआरें कन्नै गल्लबात करना ते मौके पर गै लोके दी शकैतें दा नबेड़ा करना हा। इस दौरान उपमुख्यमंत्री होरें नुकसान पुज्जे दे घरें दा मुआयना बी कीता। उनें लोके गी भरोसा दोआया जे सरकार उंदी सुरक्षा ते भलाई बेहतरी लेई पूरी चाल्ली बचने बज्झी दी ऐ। इस मौके पर बोलदे होई उपमुख्यमंत्री सुरिंद्र चौधरी होरें आखेआ।

<><><><><><>

#### Rana-LoC

जल शक्ति मंत्री जावेद अहमद राणा होरें कब्जा रेखा कन्नै लगदे इलाके च रौहने आहले लोके दी हिम्मत ते दलेरी दी सराहना कीती जेड़े उत्थे कुसै बी हालात च मजबूती कन्नै खड़ोते दे रौहंदे न। मंत्री होरें कब्जा रेखा कन्नै लगदे इलाके दे ग्राएं दा लगातार त्रीए रोज बी दौरा लाया ते उनें लोके कन्नै मलाटी कीती जेड़े बन्ने पारा सोयां होई दी गोलीबारी करी खासे प्रभावित होए। अपने दौरें दौरान मंत्री होरें होए दे नुकसान पर पूंगी चिंता जाहिर कीती ते इनें चीजें दे बच्चे, बुजुर्ग ते होरनें दुए लोके पर होए दे मानसिक असर पर बी चिंता व्यक्त कीती। उनें इस मानसिक स्थिति थवां बाहर औने लेई फौरी समर्थन ते ध्यान देने दी जरूतरा पर जोर पाया।

<><><><><><>

#### CS

मुख्य सचिव अटल डुल्लू होरें कल किशतवाड़ जिले दा दौरा लाया ते 2 पन बिजली परियोजनाएं दे कम्मै दा जायजा लैता। उनें 850 MW Rattle पन बिजली परियोजनां ते 390 MW Dul Hasti पन बिजली परियोजना दा जायजा लैता। धबशाला ब्लॉक च कायम रत्ले पन बिजली परियोजना बारै अधिकारिएं मुख्य सचिव होरें गी Power point presentation राएं व्यापक जानकारी दिती। उनें दुलहस्ती पन बिजली परियोजना दा बी दौरा लाया ते चला रदे कम्मै दा जायजा लैता। मगरा उनें NHPC, CVPPL ते HOP दे अफसरें कन्नै बी बैठक लाई।

<><><><><><>

#### Distt. Admin Poonch

पुंछ दा जिला प्रशासन बन्ने पारा सोयां होई दी गोलीबारी करी प्रभावित लोके तगर पुज्जने लेई कई सारे जत्न करा'रदा ऐ। कोई बी प्रभावित परौआर ऐसा नेई रेई जा जेदी जानकारी प्रशासन तगर नेई पुज्जे। एहदे लेई इक जत्न रिपोर्ट टू सुप्पोर्ट चलाया जा'रदा ऐ तां जे प्रभावितें दी जानकारी थहोई सकै ते उनेंगी मदद उपलब्ध करोआई जाई सकै। लोक अपने नुकसान बारै जानकारी सिद्धे वट्सऐप राएं बी सांझी करी सकदे न। जिला प्रशासन नै ग्रामीण सतह पर कमेटियां बी खडेरियां न तां जे ब्यौरे किट्ठे कीते जाई सकन ते नुकसान दा सेई ते व्यापक जायजा लैता जाई सकै। पुंछ दे डिप्टी कश्मिनर विकास कुंडल होरें बन्ने पारा सोयां होई दी गोलीबारी करी प्रभावित परौआरें च राहत समेयान बी बंडेआ।

<><><><><><>

ते हुन बाकि दिएं खबरें कन्नै अभिलाषा शर्मा।

#### Tiranga-Yatra

भारतीय फौज दे आप्रेशन सिंदूर दी ऐतिहासिक जित नै समूलचे मुल्खै गी देशभक्ति ते गौ दी भावना कन्नै भरी दिता ऐ ते हर कोई अपने सैनिकें दी हिम्मत, दलेरी ते राष्ट्र दी रक्षा लेई उंदी समर्पण भावना दा गुणगान करा'रदा ऐ। इस्सै सिलसिले च कल जम्मू च बी इक बड़्डी तिरंगा जातरा कड़्डी गई जेदे च ज्हरां बद्दे लोकें हिस्सा लैता। आकाशवाणी दे जम्मू संवाददाता दी जानकारी मूजब इस कार्यक्रम दा आयोजन राष्ट्रीय सुरक्षा नागरिक दे बैनर हेठ कीता गेदा हा। तिरंगा जातरा इंदिरा चौक पर जेडीए पार्किंग थमां शुरू होइयै शैहरै दियें मुख-मुख शिड़कें सोयां लंग्घदी होई जम्मू दे प्रेस क्लब च जाइयै सम्पन्न होई। “वन्दे मातरम”, “जय हिंद” ते भारतीय सेना दे जयकारे दे नारे लांदे होई ते हत्थें च राष्ट्रीय झंडा लेइयै लोकें सेना दे जवानें लेई अपने अटूट समर्थन दा प्रदर्शन कीता। जातरा च समाज दे हर तबके थमां लोकें, लीडरें, सिविल सोसायटी दे सदस्यें, साबका जवानें, संतें ते बक्ख-बक्ख सामाजिक ते बपारी संगठन दे सदस्यें दी बड़ी बद्द गिनतरी च शमूलियत दिक्खी गई।

<><><><><>

#### Schools

स्कूली शिक्षा निदेशालय जम्मू नै घोषणा कीती ऐ जे समूलचे जम्मू प्रांत दे सब्बै सरकारी ते मान्यता प्राप्त निजी स्कूल जेड़े अजें तगर नेई खुल्ले देन, ओह 19 मई 2025 थमां शैक्षणिक गतिविधियें गी परतियै शुरू करी देन। आकाशवाणी दे जम्मू संवाददाता दी जानकारी मूजब सब्बन जेनल शिक्षा अधिकारियें गी आखेआ गेआ ऐ जे सुरक्षा सरबन्धी नियमें-कायदें दी सख्ती नै पालमा यकीनी बनान। एहदे अलावा संस्थाएं दे प्रधानें गी बी हिदायतां दितियां गेइयां न जे ओह मकामी प्रशासन ते कन्नू नाफिज करने आहली एजेंसिएं कन्नै नेइमा तालमेल बनाइयै रक्खन तां जे स्कूलें गी खोलने लेई सुरक्षित ते सुचारु प्रक्रिया यकीनी बनी सकै।

<><><><><>

#### DC-Rajouri

राजौरी जिले दे डिप्टी कमिशनर अभिषेक शर्मा होरें कबजा रेखा कन्नै लगदे इलाकें च रौहने आहले लोकें दी बन्ने पारां सोयां होने आहली गोलीबारी दौरान सुरक्षा गी यकीनी बनाने लेई समुदायिक बंकर कायम करने आसतै जमीन तलाश करने लेई वार्ड स्टाबै टीमें दा गठन कीता ऐ। एह टीम इलाके दा व्यापक दौरा करंगन ते ऐसी थाहर दी तलाश करंगन जित्थे समुदायिक बंकर बनाए जाई सकदे न।

<><><><><>

#### DIET-Ramban

डाइट रामबन आसेआ तौले गै अध्यापकें लेई समर्थ निर्माण आहला कार्यक्रम शुरू कीता जाग। एहदा मकसद बच्चें दे समर्थ गी बदना, उनेंगी बेहतर ांगै सिर पैदा होने आहली चुनौतिएं कन्ने निबडने लेई तैयार करना ते लक्षित नतीजे हासिल करना ऐ। इस दौरान अध्यापकें दी Mathematics skills बदना ते अध्यापकें दे ज्ञान च बाददा करने लेई कार्यक्रम होडन। एहदे राएं अध्यापक अपने पढ़ाने दे तरीके च बेहतरी आहनी सकदे न।

<><><><><>

#### Child-Marriage

जिला टास्क फोर्स कन्ने रलियै उधमपुर पुलसै पटनगढ़ लाटी थमां 14 बरें दी इक नाबालिग कुड़ी दे करोआए जा रदे बाल विवाह गी कामयाबी कन्ने रोकेआ। एहदे बारै जानकारी थोने मगरा पुलसै तुरत कारवाई करदे होई उस कुड़ी गी बचाया। बाल कल्याण समिति दी सिफारिश पर अमल करदे होई कुड़ी गी दिक्खभाल ते सुरक्षा दी लोड आहला बच्चा घोषित करियै उसी बच्चें दी दिक्खभाल सरबन्धी संस्थान च रक्खेआ गेआ ऐ। इस सरबन्धे च पुलस थाने च सब्बनै कसूरवारें खलाफ बाल विवाह पर रोक सरबन्धी कनून 2006 तैहत एफ.आई.आर दर्ज कीती जा'रदी ऐ।

<><><><><>

#### Turkey-Firm

सरकार नै तुर्किए दी ग्राउंड हैंडलिंग फर्म सेलेबी एयरपोर्ट सर्विसेज इंडिया प्राइवेट लिमिटेड दी सुरक्षा मंजूरी फौरी प्रभाs कन्ने रद्द करी दिती ऐ। शैही हवाबाजी सरबन्धी सुरक्षा ब्यूरो दे हुकमै च आखेआ गेआ ऐ जे एह फैसला राश्ट्री सुरक्षा दे हितै च लैता गेआ ऐ। इस कंपनी लेई सुरक्षा मंजूरी नवंबर-2022 च बीसीएस महानिदेशक होरें प्रदान कीती ही। सेलेबी एविएशन दिल्ली, मुंबई, बेंगलुरु, हैदराबाद, गोवा, कोच्चि ते कण्णूर सने 9वें शैहें दे ब्हाई अड्डें पर जातरी सुविधा, डुआरिएं दे संचालन, कार्गो ते डाक सेवाएं दे कन्नो-कन्नी एयरो-ब्रिज ते वेयरहाउस सेवाएं दा प्रबंधन प्रदान करदी ऐ। बीसीएस दे निर्देशें मूजब, दिल्ली अंतर्राश्ट्री ब्हाई अड्डा लिमिटेड-डायल नै इंदिरा गांधी अंतर्राश्ट्री ब्हाई अड्डे पर ग्राउंड हैंडलिंग ते कार्गो संचालन लेई जिम्मेदार सेलेबी संस्थाएं दे कन्ने सैहयोग गी औपचारिक रूप कन्ने खत्म करी दिता ऐ। निरंतरता ते परिचालन स्थिरता जकीनी बनाने लेई, डायल मजूदा ग्राउंड हैंडलिंग सेवा प्रदाताएं ते बर्ड ग्रुप दे कन्ने सक्रिय रूपै कन्ने तालमेल करै करदा ऐ।

<><><><><>

**Read by:** Shruti Khajuria & Abhilasha Sharma

**Composed By :** Varinder Kumar

**Editor :** Kunal Shrivatsa